

四庫全書

集部

欽定四庫全書

集部

文忠集卷一百六十五  
三五

詳校官庶吉士 李傳熊

主事 臣 呂雲棟 覆勘

總校官進士 臣 楊懋珩

校對官學正 臣 李 巖

謄錄監生 臣 蔣繼勳

欽定四庫全書

文忠集卷一百六十三 親征錄

宋 周必大 撰

起是年十月辛丑止壬午六月丁丑

紹興三十一年歲在辛巳十月朔辛丑降手詔金人叛盟將親征其文洪景廬所草前一日人已能誦之

癸卯雨除三招討使吳璘報九月十八日遣將彭青叔金人大寨於寶雞橋知均州武鉅奏招到北界壯海咎

朝等二萬餘人老小數萬口獲首生擒二百餘人池州都統李顯忠奏與金人三戰於正陽西敗之此月三日也時敵騎已縛橋踰淮吳璘奏九月二十七日克秦州戊午晴張真甫供職葉義問督視江淮荆襄軍馬虞允文叅謀軍事義問辟洪邁馮方同行時敵騎大入諸將多敗奔也

庚申陰晴相半聞王權與金人戰於和州境人情大洶辛酉午後出北關送葉樞矜氣大言識者憂之行府攜

軍金帛絡繹於道邵宏淵黃旗走報與金人戰於六合  
先是諸將每遇敵輒以捷告都人望旗呼舞尚書省揭  
黃榜於通衢不移時摹印徧都下驗其地則皆自北而  
南實未嘗有所獲也

壬戌聞金陷真州邵宏淵雖力戰於六合兵少不能禦  
故也

甲子陰聞金陷揚州百官宅遷徙一空

十一月朔己巳霜陰入晚稍舒劉錡報早角林大捷先

是錡軍駐注東清河口與金兵相持而完顏亮親率大軍自淮西入寇李顯忠遇之即遁遂與王權戰於廬於和權追之屢敗亮自滁入真邵宏淵又不能當亮兵將繞出錡後錡知不敵即捨清河歸維揚焚廬舍芻糧南歸敵遂兩道入矣亮至阜角林錡與戰敗之捷書聞上大嘉遣中使賜予甚厚

丙子聞此月五日李橫敗績於瓜州初劉錡卧病歸京口敵遂臨江葉義問督錡進戰錡不可亦以病實不能

行義問乃命橫將兵過江方交鋒金兵分為左右翼潛出橫後夾攻我師橫大敗諸軍赴江死者甚衆凡搗軍金帛盡為敵得橫亡矢都統印匿草間獲免或云是日中軍將劉汜臨陳先遁故敗汜錡之姪也

庚辰采石捷書聞初金兵雖勝視瓜州江濶難渡而采石淺狹且朝廷方以李顯忠代王權統金陵之師亮意其號令未定也以此月八日九日親執旗鼓督細軍臨江而聚所掠之舟密載甲士南渡會漁人牒知其期走

白顯忠及虞允文亟命舟師逆敵舟雜以木筏又其人  
不習水我以戰艦乘風衝擊賊兵皆溺死亦有數百人  
已登南岸者允文激勵士卒殊死鬪盡數殺之不然幾殆  
辛巳聞采石北師稍稍引去

乙酉聞北師聚於淮東真揚間

甲午武鉅報克鄧州外城王彥報師次長安外邑大抵  
諸軍時時以小捷聞而淮上益急

十二月朔己亥同舍皆至政府自午至酉方出堂先是



邊報稍緩宰執皆早歸一遇警急往往晚出張真父戲云欲知敵情但視堂又軍興已來陰雨連綿天氣愁沮間值晴霽必傳捷音同舍又戲云欲占吉占請視日

庚子晴鎮江諸帥報完顏亮為其下所戕亮之將敗盟也得浙匠教之航海於是大興工役造巨舟於膠西揀河北壯丁雜以金人謂之大漢軍命蘇尚書者為帥其謀我以大兵踰淮逼江中國必悉師來拒錢塘禁衛空虛則樓船可擣腹心震駭雖抽江上援兵亦已無及然

後可以得志其部分計畫皆有成設乃命張忠彥堅壁鳳翔以弊吳璘又命劉萼攻擾襄漢而亮自率精銳及簽軍號數十萬由淮東西兩道入未能渡江駐師維揚日望海道如約無何朝廷遣李寶率防海之舟先過山東將次膠西禱神祠遇順風又得謀者用其言衝敵舟舟既大而簽軍及女真不習戰擢束手敗降寶縱火焚數十艘而歸亮聞大怒暴戾益甚殺戮無常人人惴恐葛王者知其可圖也遣親信結帳下兵殺亮會亮親兵別攻

秦州左右無助乃以冬至夜作亂亮驚起為攢箭所殺  
食罷同舍相率慶二撥揚參黃樞首撥有還白溝之語  
夜鎖學士院何通遠痰眩在假劉共甫時暫攝直

辛丑文德殿宣麻李寶自右武大夫宣州觀察使提督  
海船拜靖康軍節度使克浙東西路通秦海州沿海制  
置使京東路招討使賞膠西之功也聖旨已降指揮巡  
幸視師可用十二月十日進發黃樞云今早得報十一  
月晦金兵陷秦州剽剔老幼俘掠少壯極其慘酷即亮

所遣親兵也或謂左右與葛王通謀故說亮遣之

壬寅金國大都督府牒國朝太宗皇帝創業開基有天下迄今四十餘年其間講信修睦兵革浸息百姓安業不意正隆失德師出無名使兩國生靈皆被塗炭今奉新天子命詔已從廢殞大臣將帥方議班師赴國各宜戢兵以敦舊好須議移牒具如前牒宋國三省樞密院照驗大定元年十一月三十日

丁未王彥報收復華州

戊申大雨巽時上披氈裘乘馬出北關門宰執建王以下皆紫衫從駕至稅亭御船進發留司百官班辭於東倉以泥濘免拜隨駕官宰執皆行後省金安節劉珙諫院梁仲敏宰屬徐度六部長貳凌景夏張運御史臺吳芾陳良佑御監王嘗史浩郎官曾汪余時言薛良朋馬騏姚寬餘官無數不書

己酉雨不止留守相公視事於都堂徙居於執政府職事官皆上謁

庚戌午後雨稍止王彥報收復陝州

甲寅聞車駕十四日次平江十五日歇泊今進發

丙辰陰聞樞密行府限五日結局金兵萬餘尚留和州  
李顯忠禦之

辛酉雨聞車駕二十日次鎮江未有進發之日初金之  
殘兵屯和州雞籠山李顯忠攻之不克亡失兩將金兵  
緩轡徐歸顯忠躡其後而不敢逼久之方出境

丙寅聞赦新復州軍

紹興三十二年歲在壬午正月朔戊辰車駕在鎮江太  
史局奏未時太陽交蝕甚於申復於酉雨不止無所見  
守局如式

庚午晴聞歲旦鎮江日蝕五分又聞德音赦淮南西京  
殘破州軍

壬申陰陳宗鄧置酒省中聞車駕此月三日發鎮江

丁丑吳玘等報十二月十二日收復汝州武鉅報十四

日復嵩州

己卯武鉅報十二月九日義兵復西京又聞王師復壽春府其實入空城而已金兵至則又棄之

丙戌聞有旨班進討之師糧運不繼且疫癘大作也

戊子聞有旨二月六日回蹕

癸巳聞金人遣使告即位二十三日聖旨差洪邁張倫充接伴使副邁借左朝議大夫試尚書禮部侍郎

二月癸卯駕離金陵

丙午發鎮江



丁未太尉劉錡薨

乙卯五更出餘杭門五里迎御舟

丙辰丁巳戊午歇泊假

己未文武百僚詣後殿問聖體

乙丑幹辦諸軍審計司嚴致明云常歲除川陝外諸軍  
支春衣二十四萬餘疋今春止二十一萬餘疋蓋自去  
冬用師開啓三萬而隱冒不與焉著作佐郎張震權倉  
部郎官云行在百司及內人月支米十四萬餘石內外

諸軍歲支米四百餘萬石

三月庚子聖旨扈從及隨逐一行官吏軍兵依紹興四年扈從至平江府例並特與轉一官資餘人犒設一次  
樞密行府官吏軍兵諸色人依此推賞

癸卯吳璘報逐金人至寶雞盡得關險樞密院編修官  
鄭樵卒字愚仲興化軍人力學著書不為文章不事科  
舉屢至闕下游諸公間二十八年講筵官王綸等薦對  
特補右迪功郎主管架閣庫御史葉義問論其過失改

監南嶽廟給禮歸抄所撰通志三十一年携其書來得  
樞密院編修官請修北敵正隆官制比附中國秩字因  
求入秘書省繙閱書籍未幾又坐言者寢其事至是欲  
進通志而病數日卒年五十九樵好為考證倫類之學  
成書雖多大抵博而寡要平生甘淡泊樂施予獨切切  
於仕進識者以是少之

壬子金人使高忠建張景山入見前此三節金人乘馬入麗  
正門至是令就門外下馬喧爭甚久既而使者捧國書

上殿知閣門事趙述以祖宗舊例跪受之使者守近例  
不與述老矣相持移時仆於地上目二相陳康伯進曰  
臣等位宰相不當受其書請改用他日行禮又呼館伴  
責曰前日已議定用在京禮例今乃奈煩聖聽何也徐  
嘉懼不能對時北使方秉笏實書兩臂聞嘉詰從旁掣  
以進國書畧曰十二月日大金皇帝致書於宋帝粵自  
皇統以來修好不絕不意正隆之末師出無名且有歸  
兩淮敦舊好之語

癸丑蜀中報閏月二十五姚仲吳挺敗金師

乙卯洪邁借翰苑經筵同張倫充賀大金登寶位國信使副

丁巳北使辭答書畧曰淮甸侵疆幸先期而克復祖宗故地方遣使以請求

戊午北使出門太常少卿王普帶御器械王謙送伴成閔自淮東來朝閔之留荆襄也敵正窺采石瓜洲朝廷屢以金字牌趣閔解圍閔聲言擣陳蔡其實畏避既而

馳百餘里士卒凍餒而死者十二三至有自經於樹者  
敵退方進攻宿亳亦復無功至是歸闕懼人之議已凡  
郎官而上皆有苞苴冀以自解云

己未洪景盧出接伴雜錄云淮泗間彌望無寸木鵲巢  
平地又云道逢泰州民自敵中逃歸言初被驅迫至京  
畿百姓爭舍匿之調護甚至仍為治裝告以歸路有捨  
其馬使代步者惟過河則不可回

四月戊辰皇孫女永嘉郡主薨年十四初本瘡疹而醫

者誤投藥有旨送棘寺

庚午釋衆醫

闕

卿奏請也

辛未上為永嘉郡主輟視朝聞泛使禮物例用金器二千兩銀器二萬兩合十具匹物二千朝士言三月十七日得旨許高麗遣使來賀恢復疆土蓋綱首徐德榮為鄉導而明守韓仲通為請於朝衆論以為不然會浙東提刑樊光遠畫七不可之說其議遂閣洪州言三月二十七日資正殿學士魏良臣卒良臣字道弼金陵人登

進士第調丹徒尉移遂昌令召為勅令所刪定官擢尚書郎北敵遣二太子將兵薄淮韓世忠戰不利呂頤浩薦良臣往使時方與同舍郎觀潮得檄納筭中卒飲乃起人頗危其行良臣亦作遺令付其家脫不幸持以白父母行至楚州見世忠道使指世忠下令斷浮橋命無得以一騎踰淮良臣馳扣金營其副將鼐爾貝勒有和意勅吏授館待使者無何世忠謀知敵已弛備輕兵渡水擊其後軍殺傷甚衆鼐爾大怒謂良臣賣已麾衆



粹斬之良臣大呼曰某親老妻子幼弱誠知邊將不恤國計僥倖一旦功何苦蹈萬死來見將軍哉聃耳稍悟命韜劍驅良臣行數十里抵主帥帳前卒許和遣良臣歸報會頤浩罷相趙鼎主戰良臣請祠去久之召拜左司員外郎進檢正擢吏部侍郎烏珠寇邊邀結好詔良臣與王公亮議之金欲斥地盡江歲遺匹兩皆五十萬良臣曰被命以淮為界非江也烏珠陽諾而簽書云使者許我江北矣良臣私發其封大驚明日携入詰烏珠

背約烏珠辭窮為取璽紙易書和議自此始定

下關文

大忠集



大忠集

十三

知廬州徙池州復敷文閣待制進直學士秦檜  
用事久士大夫異已者死徙相望良臣遺秦檜書曰天  
有雷霆尚隨之以雨露欲勝天乎願為子孫計毋貽後  
悔也檜死御批召陳誠之及良臣等四人良臣先至遂  
拜參知政事紹興二十五年十二月也良臣既驟當大  
任銳意更庶事稍裁諸將回易之弊發三省堂厨官賈  
瑜罪流之人頗畏懾然學術空疎舉措多輕脫內外喧  
誚不三月罷為資政殿學士知紹興府內待鄧友護殲

宮干擾府縣良臣摘盜伐禁地林木械送行在詔貸死  
決配人頗服其果未幾提舉洞霄宮起知宣府徙潭州  
洪州所至治盜甚刻洪州之政尤暴率卒年六十九

五月丁未梁仲敏蔡寺丞洗子平相訪蔡乃君謨曾孫  
陳亞嘗有蔡襄無口便成衰之戲自是子孫立名多連  
口字惟子平從水

壬子五更至漏舍平明入麗正門宰執親王使相待從  
臺諫兩省官禮官並詣射殿立班辰時八刻皇帝自御

幄出再拜升殿奠酌顯仁皇后神御前沾灑久之在廷  
泣然神御出麗正門皇帝奉辭宰執至禮官皆騎導赴  
景靈宮文武百官奉迎於宮門騎導官步導赴後殿未  
時八刻再立班行舉安禮左僕射陳康伯充禮儀使是  
日天氣甚涼初出麗正門細仗布列鼓吹振作衆馬驚  
跳戶部汪侍郎方跨鞍而墜腰臂皆損

癸丑歇泊假欽宗小祥前輔臣至權侍郎以上赴几筵  
殿行奠酌禮以明日樞密院罷散天申節道場故前期

入奠

甲寅有旨張浚專一措置兩淮事務兼節制淮東西建康鎮江府池州軍馬

丙辰張子蓋李寶連報海州圍解金兵敗走國信使副以十六日到虹縣金國接伴使工部侍郎龐副使秘書少監闕已先在遣人致問云不須傳銜使請過界

丁巳天申節故事當拜表賀有旨免百官晨赴明慶寺望闕立班再拜賜香口宣再拜訖又再拜首相以謝表

授中使回奏頃之再追班滿散祝聖壽道場臺吏予立  
香案側謂之監香

甲子未後御筆手詔朕以不德躬履艱難荷天地祖宗祐  
之獲安大位三十有六年憂勞萬幾宵旰靡懈屬時多  
故未能雍容釋負退養壽康今邊鄙初寧可遂如志而  
皇子瑋毓德允成神器有託朕心庶幾焉可立為皇太  
子仍改名所司擇日脩禮冊命其宮室官屬儀物制度  
等疾速討論典故以聞詔自內出外廷不知也自去歲



秦檜舊府貴近密語人云上欲行唐堯故事尋以邊事  
而止今春工役甚急外議籍籍四月末親除侍御史呂  
廣問以陳康伯姻嫌改除禮侍康伯因求去上始露倦  
勤之意云朕年老多病皇子將四十可付社稷徑欲行  
內禪禮他日近臣奏云事當有漸無令四方或致驚駭  
上曰朕未思此也故先下立儲之詔而意旨已見或謂  
此即初製傳位詔云

六月戊辰殿院張真甫上殿擊朱倬仍細副本倬自拜

相即地震且立朝專務迎合中外雜然譏訕臺諫欲論  
列而上眷至厚非有大惡勢不能去五月間倬聞內禪  
有定議語其子端厚端厚遽令幹辦府以狀申太府寺  
云其本國學生去秋誤作白身奏補承事郎乞批料錢  
厯為證會有密告臺諫者以為國學生與白身初不繫  
入官利害蓋臆料將來覃恩國學職事及得解人或可  
免省而倬在相位可主此議又懼人之知也故不於禮  
部而言之太府但欲取官文書照使爾彈文專指此事

并面奏大臣懷奸覬幸非常不可恕上聞之變色

辛未御營宿衛使楊存中保明扈衛統制將佐使臣軍  
兵等四萬三百五十二人四月六日奉旨諸班直等三  
百三十四人并諸軍扈衛官兵二萬九千七百三十二  
人各特與轉一官資出戍暴露并扈衛官兵二萬九千  
七百三十二人各特與轉兩官資今日報臺見之

癸酉侍從臺諫禮官就御史臺集議故宗室子偁并妻  
加封事初朝士有以子偁恩數白宰相者宰相難之既

而冒昧進呈上曰他日誠難處置今了却甚善尋有旨  
皇太子所生父子稱贈秀王追謚安僖中書舍人唐文  
君既書董疑其未安急白宰相別取旨改稱皇太子本  
生之親俄又收回制書而降旨云故宗室子偁并妻合  
行加封令禮部官侍從臺諫檢照典故討論聞奏於是  
諸公倣濮王之議請極其官爵使後無以加且服屬雖  
絕當從權冠以皇兄二字庶免著姓惟徐敦立汪聖錫  
呂仁甫堅欲稱宗室予與辨論久之乃肯書奏是日奉

旨子偁贈太師中書今追封秀王謚安僖妻加封秀王夫人而制中加皇兄二字

甲戌皇太子賜字元永宰臣率百官詣文德殿拜表賀立儲翰林學士洪邁等十六人以皇太子正位東宮告廟畢同班上殿稱賀實欲致戀軒之意上曰朕在位失德甚多更賴卿等掩覆真甫仲誠同對促罷朱倬上曰即有處分卿等皆分論也

乙亥旬假宣麻朱倬罷右僕射時內禪日逼宰執請止

降告上不欲廢故事就假日殿院張真甫具稟察官周元特未知一日云某昨夜夢朱相哀服還鄉且以棺自隨真甫驚異具言之解之者曰哀服者白身也端厚正以白身事故為此舉其以棺自隨殆能終保觀文乎既造廷果除觀文殿學士提舉在外宮觀臺諫交章乞禡職皆不報昨日劉共父當直以嘗為倬薦在假規免

丙子五更至待漏院平明正殿設伏上坐雨稍止禁衛閣門三衙文武百官以次起居宰執上殿奏事訖駕興

班退頃之復追班序立殿門上閣門官南向宣詔曰皇  
太子可即皇帝位朕稱太上皇帝退處德壽宮皇后稱  
太上皇后百官拜舞訖入詣殿下班皇太子即位流涕  
久之側立拱手羣臣拜舞稱賀內侍固請坐御床不許  
禮畢宰執奏事皇帝亦立聽班退雨復作太上皇帝自  
祥曦殿乘逍遙車幸德壽宮儀衛及從駕臣僚並如常  
制百官就幕次起居太上皇后相繼出陳德召司業云  
某在宗寺見玉牒載紹興初今上皇帝初入宮宰執贊

太上聖德真堯舜用心太上曰堯舜之事甚不難則脫屣之意蓋素定於當日矣

丁丑大雨駕詣德壽宮繖扇皆宮門外百官班迎泥淖沒膝不能成列初定儀注皇帝率百官朝謁太上既而詔百官免入有旨從駕臣僚亦不入但就宮中行家人禮昨日上欲從太上過宮大臣議不同而止侍從官赴都堂議赦初定太學止免職事人文解御筆皆免非故事也

文忠集卷一百六十三



欽定四庫全書

文忠集卷一百六十四

龍飛錄

宋 周必大撰

起紹興壬午六月止隆興癸未四月壬戌

紹興三十二年歲在壬午六月朔丙寅

戊寅宣赦文德殿首尾詞翰林學士洪遵草其間有云  
凡今者發政施仁之日得之問安視膳之餘蓋用御批  
語人傳誦之聖旨朕欲日朝德壽太上謂恐廢萬幾勞

煩羣下委禮官重定其期禮官請用漢帝故事五日一朝  
辛巳監察御史以上詣德壽宮起居輔臣畧至榻前太  
上幘頭寬袖赭袍玉排方帶中官八人分立殿下惟施  
繖扇不鳴鞭

乙酉祠部員外郎劉添卒添字昭信福州人進士入官  
頗窮易通禮學陳誠之在西府薦為學官改樞密院編  
修官除國子博士兼建王府小學教授本專用館職王  
十朋既去朱倬以命添而降旨云教授闕差館職學官

兼領俄擢祠曹郎而兼職不改也東宮立宰職請遷王  
府官僚太上曰小學何勞之有止遷史浩張闡時蒸已  
被病未幾卒年六十四贈秘閣修撰三王各賻銀絹百  
蒸初被召尚在選調吏誤召嶺南人京官劉蒸久之始  
悟朝廷除廣州通判遣之至是蒸卒而劉蒸適自梅州  
守乞致仕異哉

己丑太上以車駕五日一朝為煩詔用朔望初二十  
二日詣德壽宮

辛卯德壽宮月進錢十萬貫太上令止進四萬貫

甲午文德殿宣詔書上太上皇帝尊號曰光堯壽聖太上皇帝太上皇后曰壽聖太上皇后先是禮官與執政已定此號然後令有司集議二十二日侍從臺諫禮官會於都堂左相授筆書云云或謂尊號始自開寶至元豐罷之萬世不可易也汪聖錫持此議尤力給舍臺諫多從其說故不簽議狀者大半而洪翰林已草光堯壽聖之議矣二十三日進呈奉旨恭依汪聖錫徐敦立二侍

郎及給舍臺諫各以狀申都省云尊號既非矣而光堯  
近神堯壽聖乃英宗誕節且嘗名寺不可用也二十五  
日遂降旨謂已奏太上不容但恐以數字未善更令金  
安節張震等商量疾速來上金彥亨在禁從簽書中官  
最長而真父臺諫之從故也明日彥亨真父等請再集  
百官議二十七日聖旨不須別議願與簽書前議者聽  
諸公知不可回皆與簽書

七月朔丙申先天節假連日蜚蝗自宣湖入臨安界綿

亘數十里所過赭其山而不甚害稼江浙間三十餘年前嘗有之

丁酉監察御史以上赴德壽宮起居既卷班輔臣升殿問聖躬次從官次楊存忠趙密田師中鄭恭等太上有所獎諭存忠等曲謝三四客云豺能殺虎鼠可害象事固不可忽也

戊戌量料登極赦諸軍優賞共支銀三十八萬三千一百餘兩殿前司捧日都虞候軍額等至請軍長行一十

九萬四千一百餘兩馬軍司龍衛都虞候軍額等至請  
軍長行五萬四千三百餘兩步軍司神衛都虞候軍額  
等至請軍長行九萬九千七百餘兩諸百官司等處三  
衛差到軍兵自都虞軍額等至長行三萬五千餘兩

已亥百官受誓戒於尚書省奉勅攝光祿丞以此月十  
四日皇帝親饗太廟也按國朝會要無即位親饗故事  
太常官比附郊祀定此禮初請乘玉輅上不許稍令裁  
定

癸卯德壽聖旨前嘗止宰執等月內兩次到宮今聞尚  
與前說不異緣宮前無待漏處緩急陰雨使百官暴露  
殊不安懷可今後只初二日率從官同來一次時宣麻  
張浚自特進大觀文除少傅江淮宣撫使進封魏國公  
昨日鎖院劉共父當直不召就給假中宣吏直翁初三  
省議除少保改封次國制出乃少傅大國或云直翁與  
謀陳樞不樂曰真內相也

戊申赴太廟致齋大雨終日夜暴風達旦軒簸可畏太



史局奏地震

己酉五更皇帝親饗太廟初行禮大風既而雨作張魏公申請內一項除申朝廷用狀餘皆劄子或謂非是執政不當如此

癸丑聖旨罷御前激賞庫歸左帑謂之南庫從袁仲誠諫疏也自秦氏斂中外之財輸御前雖時有進納而三省密院移用為多有司莫得稽考上銳意除去士大夫以為盛舉又有三省密院激賞庫頃嘗裁定歲給十萬

緡而已汪聖錫云呂元直為相堂厨每廳日食四千至  
秦檜之堂厨每食折四十餘千餘執政有差於是始不  
會食胡明仲侍郎嘗謂雖欲伴食不可得矣

丙辰臨安訪求岳飛墳在錢塘門外當時私號賈宜人  
墳今將一品禮葬之

癸亥內侍李綽罷提舉軍器所初上以器械不犀利故  
以付綽而不令隸部監既而綽張大其事日有啓請且  
辟置官屬上意於是向綽諭真甫仲誠云祖宗朝中官

嘗掌兵此亦何害二人論奏不已遂降御筆云覽卿所  
奏備見忠讜已令復隸部監然綽猶未罷也二人再論  
列而任信孺陳應求因內殿引對亦及之乃令綽自請  
罷提舉而改用統制官

甲子洪景盧張方甫入燕國書畧曰使介未庭緘題越  
式固違羣議特往報書又曰宣靖既遷楚齊繼及又曰  
海陵失德江介興師過乃止於一身盟固難於屢變又  
曰尺書侮慢既匪藩臣寸地侵陵又違誓表又曰殊無

致賀之詞繼有難從之請若使干戈不息賦歛繁興墜  
民塗炭咎將誰執而未句云尚敦舊好勿徇羣言初景  
廬在境上與接伴約用敵國禮接伴許諾故沿路表章  
皆用京舊式纔入燕京盡却回使邀景廬依近例易之  
景廬不可於是扁驛門絕供饋而館伴者云嘗從景廬  
父尚書公學陽吐情實言勿固執恐無好事須通一線  
路乃佳景廬等懼留易表章授之既入見使副例不跪  
至是皆跪金主傳令云國書不如式不當受可付有司

其詭詐虛喝類此

八月己巳成閔保奏瓜州及阜角林陣亡將校長行共三千一百一十三人其實阜角林所喪甚少而瓜州之敗恐不止此也

戊寅宮門早二刻開行事官朝服入赴大慶殿各庀其職皇帝服通天冠絳紗袍發冊寶訖內臣僚常服出和寧門導冊寶詣德壽宮有頃駕來太上皇帝御殿皇帝入拜殿上奉冊寶訖行事官歸班百官拜舞稱賀太上

皇帝太上皇后訖退昨晚詔迎天竺觀音祈晴今日雨  
意垂垂僅能成禮有旨光堯壽聖太上皇帝上尊號進  
銀五萬兩壽聖太上皇后三萬兩八月二十一日生辰  
進銀三萬兩先是有司引唐順宗故事雖有欽宗服制  
不妨上冊寶但欲設樂而不作禮部郎官劉儀鳳以唐  
實行易月之制與本朝不同著議甚典麗然卒從有司  
所請

丁亥除起居郎

己丑後殿侍立退詣文德殿拜表請以會慶名聖節殿  
門侍班幕次臺諫皆設椅子近臣則各以交床自隨徐敦  
立相戲云罰却椅子矣

癸巳拜第二表請聖節名是月九日奉旨吳拱保奏今  
年二月五日金人攻汝州我兵追趕過河又二月二  
十四日直來城下掩擊敗走及發兵深入收服永安軍  
并永寧福昌長水等縣并金人攻打蔡州遂發統制王  
宣等前去確山縣解圍等事保明實立功官兵

二萬五千五十四人奇功一千四十八人各特轉兩官  
資第一等三千二百六十八人第二等八千九百八十  
七人第三等一萬一千七百四十七人各特轉一官資  
九月朔甲午駕詣德壽宮上御內殿輔臣奏事畢自祥  
曦舊殿登輦殿面西常日但為行廊凡駕出輔臣若無  
奏事則經於祥曦設御坐鳴鞭山呼如儀左右史例隨  
應奉官兩拜起居次宰執從官親王使相等兩拜起居  
班退而輦升左藏庫冊寶支賜銀八千兩絹九千疋



乙未早赴德壽宮起居退詣文德殿聽批答所請十月  
二十二日為會慶節魏申為漢宣帝光武唐肅宗皆亥  
生

丁未勅燕編類聖政所詳定官右正言袁字知溫州字  
論德壽宮中官梁康民欲就官側開酷事上批其章云  
覽卿所奏及德壽宮朕令詢問即無此事朕心悚然尋  
批出除字吏部郎官大臣以為不可字請去故有是命  
尋又除直秘閣丁巳兼權中書舍人

十月辛巳聞吳璘捨德順歸秦州

癸未旬假宣麻張子蓋以海州解圍立功加檢校少保  
十餘年來武臣節度使一轉即拜真太尉自子蓋始

十一月甲午早赴德壽宮起居韓知閤怒云紹興七八  
年間同莫將使金國不許至其都止燕山以待久之報  
金主來將等亦不得見但呼至都堂其宰相等五人設  
榻坐堂上將等立白事被詬辱幾不可堪既留國書即  
從將等於涿州駙中伺守頗嚴遇太守來招議事將怒

以下皆朝服步往未嘗給車馬也

乙未以內教權罷講筵是日常未講舊例臨安具酒饌  
比亦廢此禮學士院設食三品而已時洪翰林兼侍讀  
丙申鎮江張子蓋遣契丹歸正人蕭哲伯來譯者謂契  
丹為金人所敗此曹道來然未可信

戊戌講筵所例賜冬至節儀講讀官錢五十千酒六斗  
修注官錢三十千酒四斗

己亥就都亭駟賜蕭哲伯等四十五御筵酒七盞初議

遣從官押宴與給舍白宰執止之

庚子日南至稍晴早入麗正門赴文德殿拜表稱賀過  
祥曦殿起居從駕詣德壽宮皇帝入大次百官班殿下  
皇帝步入小次太上皇帝御殿應奉官禮官導皇帝自  
東階升北面四拜訖西向日百官拜舞如儀禮畢皇帝  
從太上皇帝還內班退歸幕次未後從駕回是日太上  
宣蕭哲伯等入宮擊毬賜銀碗有差

戊申詔改來年正月一日為隆興元年曾子宣日記有

此號

壬子旬假雨中訪陸務觀務觀綽約美少至則與共飯務  
觀云嘗記先人說紅鞋飾帶始唐莊宗施之優人程俱  
致道云邇來龐元英文昌雜錄云滑臺賈昌朝畫像猶  
是黑鞋金玉帶不知紅鞋果起於何時

丙辰張震除中書舍人或謂廟堂有所疑故峻遷使去  
風憲上諭三省云震知無不言言皆當理遂諭當制舍  
人載之訓詞真甫辭免去自太上中興殿中侍御史凡

五十二人未有徑除三省者

十二月戊辰省劄坐同知樞密院事張燾所奏并降御札召侍從兩省臺諫赴尚書省拜受訖就都堂給筆札令條具時弊仍各諭其官屬次第以聞衆議乞許三日內條對逐具奏聞

己巳景靈宮行香御筆督條對史參乞少寬之務令詳盡上親批數十語大畧謂近臣非若疎遠之士不知時務令宣之於口書之於簡何擇為若徇人情朕所不取

史參奏陛下姑欲知時弊非掩士大夫不脩而窮其所短也并繳洪翰林以下所援仁宗給札故事退而條具上乃從之

己酉微雪越人以欲雪而日光穿漏為雪眼

乙丑百官赴太廟門外班迎安穆皇后神主退入幕次俟丁時祔神主於別廟禮官初欲依薦享例用樂予奏安穆乃欽宗侄婦不可樂周元特亦論之詔可

庚寅秘書少監陳棠卒字德邵常州人年六十二近秘

閣柱裂有聲人以為長貳不祥之應

隆興元年歲在癸未正月癸巳晴金人陷水洛城城在德順軍秦州之間金先以兵與吳挺相持於德順一旦焚寨引去挺不疑其偽遁施備金自間道徑趨水洛斷我師歸路而城中兵甚少故陷之

丙辰盱眙報富察特默領兵據虹縣虹穆故泗守也自失其地即寓宿州睥睨故疆而不可得既陷虹縣遂稱泗州居之



庚子宣麻史浩拜右僕射兼樞密使張浚拜樞密使都督江淮軍馬昨日擬定魏公除目上以筆圈去樞密使三字止升都督今早執政奏事聞之請如初議而制已付閣門遂用舊文首尾詞告廷而令直學士院劉珙歸改其詞行下是日鎖禮部貢院勅差翰林承旨洪遵知舉兵部侍郎周葵中書舍人張震同知以免解就試人衆增參詳官二人點檢官四人國子司業王十朋為別院考試官

戊午貢院言承旨揮比前舉取過人數共添取一百人  
檢照前舉凡三千五百四十四人終場取過二百五十  
四人今合取三百五十四人而去年覃恩免解徐鼎劍  
州不曾申到數目外國學一千三百四人建寧府一千  
八十九人洪州二百三十八人宣州二百七人已上共  
二千八百三十八人內有八百六十五人未來就試今  
於增添一百人額內指留三十人克未到合取之數從  
之貢院言常舉共得錢一萬二千貫酒二百石今官吏

增多乞增錢六千貫酒一百八十石詔給半

二月甲子蜀中探報敵據水洛城吳挺棄德順間道歸  
丁卯徐稚山侍郎論秋菊落英事予謂有二說一則謂  
花落色衰一則落訓初如所謂訪予落止者義見爾雅  
蓋取菊之初英食之

戊寅吳拱正月二十八日軍前申狀云向起勝軍皆自  
德順拔近頗多亡失我師焚秦州退保阜郊

三月壬辰朔張魏公繳進北界副元帥赫舍哩志寧回

書來上其式云志寧白宣撫執事書詞大畧謂向者新  
主初立即捨淮南地先遣信使而宋乃襲我歸師稍侵  
五疆今得來書以天時人事逆順為言固爭舊禮不議  
他事且陝西所失地近已克復將士或執或死其數甚  
多此由宋國貪土地之故不順天德不惜人命以致此  
也志寧材雖不武被命分閩師之進止得以專之倘能  
先歸侵地以示誠款則往復之禮乃可徐議今則按兵  
不動以俟來音宜深思熟慮毋貽後悔初魏公以其拒

我使者嘗移書開諭之故復用此意來答

甲寅夜與共甫宿省中來日覆試權要親族過省者

乙卯雨作寒引試七人禮義積而民和親論初秦氏子  
侄竊高科而諸將亦行賂效之檜死議者請按乾德咸  
平故事凡兩省臺諫侍從以上謂之權要其有服親登  
第皆令覆試雖有旨依而未嘗舉行今歲趙密之子右  
承事郎賡過省衆疑其假手也欲驗之而賡果託疾不  
來

四月壬戌奉祠出郡

文忠集卷一百六十四

欽定四庫全書

文忠集卷一百六十五

歸廬陵日記

宋 周必大 撰

起隆興癸未三月甲辰止是年六月壬午

紹興壬午壽皇初政予自御史擢起居郎兼權中書舍  
人聖政所詳定官明年癸未改元隆興時龍大淵曾覲  
頗用事予因進故事每以為言尋繳其知閣之命坐是  
請祠而去以三月庚申出關六月壬午歸至廬陵之永

和鎮此當時行記也閱八年迨乾道庚寅始還朝云

三月甲辰晴同金給事彥亨繳駁龍大淵曾覲除知閣  
指揮近臺諫交章論列二人怙寵妄作既而止罷大淵  
副都承旨而覲自帶御器械並有此遷又中書舍人張  
真甫之出頗涉大淵外議紛然故論之

乙巳二相呼召都堂宣示御札大畧謂給舍論大淵等並  
為人鼓惑議論羣起在太上時豈敢如此同彥亨歸家待罪  
丁巳被旨無罪可待



已酉再同彥亨入奏乞罷

庚戌再被旨不允仍令宰執諭旨早叅假

壬子同彥亨叅假講筵留身謝上曰朕察卿務舉職但朕欲破朋黨振紀綱耳卿第安心

甲寅二相道上意已再除兩知閣且云給舍想已無他  
子曰前降指揮大淵別與差遣覲依舊帶御器械今據  
申命豈敢但已遂留除命不下

乙卯在揆奏後省不書二知閣錄黃上令龍大淵與在

京宮觀既批旨御筆且令止

丙辰三省再奏龍大淵既未與宮觀欲且用朝止差權  
閣門凡百與正除無異但不繇後省爾上再三不可云  
且待

戊午常朝退欲就講筵納劄子乞祠會有旨權住講遂  
入奏

己未御批依所乞三省擬職名以進御批更不除職名  
龍大淵改幹辦皇城司

庚申受勅主管台州崇道觀以狀申尚書省乞免謝辭  
四月朔辛酉輜重發舟

壬戌出暗門寓寶成寺予以庚辰歲三月二十八日到  
闕今以是日離後省四月二日供職太學今以是日出  
門適三年矣

癸亥至廣茲別姚媪墳

甲子雨旋霽骨肉登舟出城予循城過北關就之李平  
叔大監陸務觀編修鄒德章監丞王致君判院范至能

省幹携詩相送解舟至閘下遇修梁而止

乙丑晴後陰甥尚貢之告別遂行夜距長安閘十餘里  
止

丙寅大風雨過崇德縣不留夜宿福嚴渡口

丁卯大風雨不止早樞密使張魏公入奏事舟過謁之  
并見其子欽夫及屬官馮圓仲攜兒上福嚴寺屋宇皆  
新惟佛殿天禧舊物也昔有真覺大師志添歸老此寺  
志添即泉州南安嚴主之門人能持胎藏咒為人却鬼

魅不祥自宮禁妃貴皆尊信之仁宗賜御書戒定慧及  
梵書兩軸皆金字也元祐中陳才人為遂寧郡王施高  
麗磨衲袈裟一副上有金環錫勒郡王所題二十三字  
才人即欽慈皇后王蓋徽宗也又有南安巖主數字皆  
巖寺中黃魯直嘗作蓮花岩銘今刻泉州蓋志添自京  
師歸時送之風稍定解舟晚距秀州三十五里止  
戊辰晴過秀州不留晚宿施涇

己已過平望少留未後抵吳江縣登塔四層攜家游隴

庵名園也主人王氏名份申後移舟過垂虹泊縣北

庚午乘順風而行過平江府不留夜宿無錫縣

辛未早雨旋止過洛社少留攜兒登開利寺寺有十數

小院夜宿常州門外

壬申自城中過晚泊沙子口

癸酉過沙子風大作白濤淺溢舟人束手強之使行而  
風亦止晚至計亭船尾高不能度橋遂止王仲賢來迎  
甲戌早入荆谿次宜興縣舟過長橋水極清駛篙師幾

不能制午後乃至外舅宅相別四年矣

乙亥邑宰姜敷言詔以下及莊氏諸親徃復不盡記

丁丑早出南門度銀樹嶺至臺莊拜外祖給事墳守者  
盛四七死已二年惟一女在破屋半間而已相去里許  
有毛百一毛百二呼來共治祭奠

已卯赴寺觀開啓天申節

庚辰天氣清和同莊德邁出南門約行四十里游洞靈  
觀閱長慶四年楊漢公題名碑保大九年韓熙載記文

本朝蔡肇詩主者應若谷出天禧金寶牌慈聖光獻皇  
后玉袞校又指聖母殿小池云京師醴泉觀水也飯罷  
登山入張公洞初至燒香臺頗平廣自此下臨棧道篝  
火以入怪石錯立如真武像如人形如後狹如耐重蹲  
踞不可殫名道士指一穴曰此天師煉丹灶也穴中土  
黃而細可治瘡壓驚取之不竭又指石上獸跡曰此天  
師繫驢處也路窮攀緣而上有穴達山背謂之風洞穴  
口甚隘匍匐乃可出游洞宜冬冬則氣溫且不蒸潤今



日挾纒猶凜凜也此去金沙寺願山陸希聲講易臺皆  
不遠日已斜不果往與德邁對飲洞口之石巖流水平  
布頗類水洞久之遂過湖狀鎮山色如畫溪水紺綠所  
謂罨畫也惠氏南園葺治極有法溪流正貫園中隅街  
即大第吾方倦游不無慕焉歸縣一更後矣

乙酉報謁郭提舉

知訓字宅心

樞密

三益

之子宅在觀巷自

謂東坡舊居門外數步即通真觀造於陳大建三年初  
名弘道唐改興道本朝賜今名殿宇摧敗過者懼壓焉

觀中有雙栢院紹興二十八年大風拔一栢去其存者甚大有丹井道士相傳呂洞賓屢至此以為有丹也唐人嘗作觀記南唐徐鉉亦為之鉉篆其額是日外舅置酒相餞初夜起視雲氣甚異

丙戌留妻孥外舅家單舸發宜興溪流清快不移時至定誇蓋太湖口也

丁亥舟人言風作予乘轎陸去崎嶇三十餘里方至荻浦而舟自湖中來今日風本不高而波浪洶湧聲如萬

木沉風餐乎晚泊獨木山下葉家園去湖州十八里

戊子早過湖州望城中樓觀縹緲環以溪山宜晉唐以  
為名郡也申時過德清縣溪橋頗壯麗有左顧亭謂放  
龜也二更宿鳳口

己丑早過安溪午後至餘杭縣艤舟稅亭下溪流即若  
水也自天目山出注於湖過寶輪寺祭程氏亡妹一娘  
寺興於齊之永明真廟時賜今額經兵火惟存鐘樓晚  
宿沈監稅宅尚貢之婦家也貢之在城中

庚寅早同祝升卿秀才遊洞霄宮去縣約二十里青山  
九鎖溪流不斷道傍有仙人跡相傳秦始皇移山仙人  
拒之其說荒唐難據衆山之中一峰稍高者天柱也宮  
門立錢鏐大碑頗叙興廢餘皆無所考招知宮監義陳  
希聲飯觀撫掌泉泉水常瀆溢而不加多徧遊五洞惟  
大滌可觀頂如砥平入至龍井而止棲真洞去宮稍遠  
山極高可望府城洞中有石乳下覆如寶蓋石室洞甚  
平道士云以吳天師藏書劍得名龍洞風洞不可入強

名耳未時還縣貢之自府中來置酒待諸沈

五月朔辛卯早同貢之甥遊徑山道過無相院普淨院  
約四十五里至山下雨作飯於解院院後有玉乳泉白  
稱其名肩輿上山少休半山亭彌望皆大杉風雨過之  
龍虎吟嘯令人聳然自山脚至寺僅十里地本龍湫唐  
國一禪師化而居之形勝峻窄屋宇層出不足以容衆  
今大慧禪師宗果為長老時用意創千層閣遂為巨剎  
舊無常住云龍自打供不許置田其奉事龍神甚嚴井

在祠前相傳水通天目山東坡所謂乞歸洗眼者此水也齋粥不敢擊木魚往嘗誤擊地裂魚湧以魚龍為同類也山多兩足小蛇不傷人背有金縷自腰以下純青云龍神眷屬也長老蘊粟來迂同訪黃世永文昌從政遂見果禪師於明月堂

壬辰黎明同世永至含輝亭候日出陰翳無所見下視羣山皆培塿也食罷乘山輜游白雲庵菖蒲田碣石巖又有凌霄亭峻甚不果遊此寺之後山也歸歷僧寮作

坊軒窓欄檻間雲氣可掬昨日自邑中來望叢林在山  
半即寺場也若其山之最尊者必能極目萬里

癸巳同世永出寺門步至南塔峰眼界可亞含暉連日  
冒嵐氣又陪果禪師蔬食遂作脾寒薄暮大嘔乃定是  
夜施主作水陸道場二更就含輝請聖衆老請觀聖燈  
閃爍合離如曳螢燭上下衆烽之間云龍神所化也頃  
有人掩得之葢木葉耳請聖畢迎入寺中饒鉞旗幡鼓  
吹俳優紛然前導龕龕替俗士如此昨日衆老以新到具

飯待果子亦在坐每食必獻藝支利物如州郡體亦可笑也

甲午別果老下山果令侍者了賢同世永送別無相寺未時抵餘杭小酌沈家遂行貢之甥送至嶽廟前晚宿彭塢口柴店離縣十五里

乙未欲便道趨桐廬故由桐嶺入長福院午飯值盛夏僱夫懦弱數步一息急改塗之富陽縣少休於接待院為舟行計得舟即解去偶遇上水風夜半至桐廬縣是



日路中見村夫戴艾葉方記端午市十數稜均及僕隸  
丙申早發桐廬雨作風猶順泊七里灘登嚴先生祠堂  
今謂之九壠院有三僧主香火先生塑像居中以方處  
士范文正公配堂中有唐崔儒所作記而李宗諤修圖  
經誤書作碑人姓名前郡守董弁辨證詳明刻於碑陰  
釣臺高峻雨滑不可上解舟回望而已晚次嚴州泊安  
流亭下

丁酉吳守槩倅司馬偁潘昌期及州官相訪司馬即文

正公曾孫潘太一王之孫建德令趙芟清獻家也晚赴  
州會於高風堂

戊戌早行諸公送別放生池上圖經謂之西湖山郡殊  
無陂澤故貴之連雨小溪暴漲徒涉頗艱晚過白沙渡  
宿葉家店

己亥早過壽昌縣飯於廣安寺晚至烏石山山如削鐵  
懸瀑十仞其上有幽巖精舍今為宗室儀恭孝王功德  
寺意欲一遊而從者終日冒大雨皆告憊遂呼山輜而

上路極峻狹約三里乃至樓閣層出極目千里舊巖在  
山之頂以形勢迫窄徙焉紹興甲寅張魏公題字案間  
僧就刻之忽忽下山籠篋皆遠去日暮泥濘崎嶇奔走  
至更後及於大樓亦好奇之過也

庚子雨行極勞過順溪市井頗盛食時至蓮花寺溪漲  
橋斷遂宿

辛丑早行二三里過趙清獻公神道不果入至溪邊僅  
得小舟爭濟者紛然既渡溪地勢平行山遠而秀非巖

陵可比也午後抵衢州沈守度任倅昌照潘倅齡李教授知已新邵守李大夫元老肇慶守王大夫衣筠守曾朝散遜相見入城泊如歸館大雨終夕

壬寅雨毛平仲并提幹自爛柯石橋相訪赴州會於思政堂堂頗宏麗張嶼巨山所造未後發衢州聞常山道中溪漲無舟遂行江山路宿新礪去城三十里

癸卯過江山縣避雨海會寺

梁天監中某甲捨宅造

雨不止復行

途中邸店頗多望見江卽石三株拔起平地晚抵禮賢

鎮投宿太平寺寺極破弊長老善參來謁自衢州至此  
凡一百一十里

甲辰入信州界邸店稀矣晚投宿靈鷲寺之駐麾堂寺  
宇幽潔山勢環抱貫休嘗留詩同長老智源至光相洞  
口將仕郎李叔度龍舉並自臨安來共宿叔度辰州叙  
浦人舉潭州人雨晝夜不止

乙巳早冒雨行已而少霽自昨日路已磽确今日尤崎  
嶇也食頃次永豐縣縣官相見同年涂文伯為丞致羊

麴報謁即行過唐校書郎有道先生墓申後至中園有  
報恩寺粗雅潔欲宿不果行至信州之水南日已落矣  
遂入太霞宮寓客充滿無所容膝排道士之闥宿焉是  
日行八十里里堠又遠故費力如此

丙午早至江邊濁流渾渾上侵民居呼小舟過渡甚危  
繞城詣廣教展墓館於藏殿長老懷壁閔士劉大方相  
訪陳守扁蘇倅楷田提幹興宗陽教授衡沈上饒作式  
前興化呂守大舉繼來蘇沈呂皆金陵僚舊陽同年也

是日纔晴夜復大風雨

丁未晴設僧供招壁老劉生飯鄒延昌山人參自云為  
先妣卜地者訪陳學正并及其侄惇予頃在此從陳彥  
國先生學并其弟惇其子也請奉米遺之過并始并八  
姪宅又過四一監家廟哭廿九舅報謁沈上饒縣治極  
宏壯前令周閱為之閱有吏材侍郎綱之子其子權今  
為此州司戶

戊申焚黃畢赴州會於面山堂後圃宛然記舊游二十

八年矣時章思召為郡守外家猶盛今惟敗其室者與孟女存耳予既久失慈訓而妣之乳母孟亡弟子柔予之乳母姚婢永壽無一在者誦無人論舊事之句墮淚久之上饒五伯祝文來其居與先夫人墳相直勞以緡錢已酉早至陳先生宅拜其夫人詹氏年七十聰敏過人正言公之女也其子惇言其舅詹房州堯可幹人朱姓者有子年二十貌甚肖通判舅氏婢望兒有孕而逃為朱氏所得此子疑吾舅子也望兒今復嫁一朱秀才而



二朱皆在玉山予驚喜徐詰其名惇懼紛紜不復肯言  
姑志之申後登舟溪漲艫鳴岸如奔馬夜泊唐羅步後  
十二年歲在乙未三月七日被召過玉山陳君相送於  
此因呼朱氏子來其名曰遂不能辨其是否蓋望兒初  
入汪聖錫家旋歸詹氏而生此子詹以畀其幹人朱慶  
遂冒其姓云

庚戌早過汭口鎮弋陽縣皆不泊終朝望見龜峰如行  
南康江中對五老峰所謂橫看成嶺側成峰者甚欲一

至其下而溪湍不能艤岸午後強舟人使泊得步曰桃

花上有步口市僮二夫前導約十餘里抵瑞相院

今為陳丞

相功德院

長老慧光來謁院前後皆逼山而其前列三十二

峰大抵皆石崖也地勢峻迫以無水為患門外有觀音

泉可汲予初謂山勢昂首俯背故以龜名寺僧乃指山

頂石形如龜云回至渡口入桃花臺之妙音院頗有前

輩題詠元絳厚之參政之父守文亦有詩厚之為刻碑

臺乃臨溪盤石耳未嘗種桃惟石上窠臼十數復有孤

松相傳道士於此鍊丹或云葛洪非也申時解去晚抵  
貴溪縣泊三山堂下三山對溪石山也相惡無足觀是  
日舟中望遠山極秀傑舟人云靈山也跨饒信二州界  
云知縣右通直郎談莊來捨舟館於縣駟此去上清宮  
龍虎山不遠暑盛僕疲且聞泛舟詰曲方見形勢不果  
遊

辛亥天申節訪十八外祖宅見四二舅

筌得可

及其所生

養娘四十舅

筌同可

侍叔外祖母攝官靜江未歸叔外祖

二女其長再嫁田昭次嫁徐兢明叔之子其老僕李安  
相州人識先父云食罷發貴溪縣陸行四十五里宿香  
爐源途遷沮洳八九十里

壬子欽宗大祥過仙巖望衆峰聯屬俗呼為排衙山曾

宣教熹遣人致書晚宿大嶺

距金谿  
十餘里

是日涉安仁入金

谿界路稍平道易中見撫守張安國榜示民戶凡竒零  
稅絹別差官受納隨給戶鈔其法可取

癸丑早至金谿乙卯歲嘗過此值大水留數日知縣右

通直郎李煒邢州人宣和二年御史中丞森之子煒言其父在臺時待制鄧之綱進狀訴太傅王甫強娶其愛妾阿馬於別館經宿乃遣事下臺治如所訴甫乞移獄御批改送開封府尹王鼎攝之綱訊杖二百遂承誣告森坐比罷與元符以來詔旨所載畧同尉會大鼎字國器永和人來致家釀少留縣馱易轎夫而行至耿源市有新興寺天尚早不宿過清江渡甚狹而水可造紙晚下路里許投宿靈巖寺雅潔可愛賃篋軒大竹

成林離金谿四十里

甲寅早入南城界過章山寺少休午後抵軍城軍本撫  
之南城縣水號盱江張天覺為江西漕窮其源出血木  
嶺留五言詩一首新守趙子掄將至郡官皆不在惟通  
判龔朝奉鑄教授劉修職溥德廣相見德廣就駟置酒  
復以郡釀鳳山泉遺之熱甚

乙卯早出西門行十餘里游麻源第三谷未至數里石  
嶺盤互水行其間略類洞霄訪卷石巖入雲門寺鄉人

南安太守陳抗父子殞寺側為之悽然寺前有靈豐廟  
正臨溪流顏魯公所謂源口有神祈雨輒應者也地出  
二石筍就塑神及夫人像遇科舉歲士人競乞夢占得  
失他祈禱亦驗崇寧中封善應真人廟中刻謝靈運三  
谷詩三谷麻姑第一桃花坪第二此為第三桃花坪今  
不可考華子岡翻經臺銅陵石磴但存髻佛耳郡人王  
三錫嘗謂書山中鑿石治亭榭種木為園規模可嘉近  
不復來山房亦廢飯罷步入太霄觀聞近處有九井或

云無足觀別由小路過麻姑約行十里至山脚尋真亭  
遇籃輿來迎遂上山其紆峻亦畧類徑山中路有界青  
亭次雙練亭梳流亭懸瀑對瀉雪濺雷吼天下奇觀也  
進至龍王祠其下有潭天寶中黃龍見於此自此始得  
平地而為仙都觀相傳即蔡經宅方士謂之丹霞小有  
天觀宇雖古而道士星居無復清高氣象主者庸景常  
具飯五峰堂五峰謂葛仙朝真望仙拜仙秦人皆強名  
也元豐間封麻姑為清真夫人元祐改封妙寂真人宣



和加上真寂冲應元君徽宗御書元君之殿四字仁宗亦嘗賜飛白餘見魯公碑魯公塑像在祠堂中近有蔡葉叅議繪十賢以配之十賢皆本土人叅政陳彭年永年直講晁無咎補之賢良李觀泰伯少卿蔡冠卿元輔左丞鄧温伯聖求灌園先生呂南公次儒侍郎朱彥世以及三曾兄弟也呂有孫已廢其業泰伯無後學中諸生歲時祝其家觀後有星杉亭齊雲亭齊雲望軍城如一聚落景常云觀之極西乃丹霞福地欣然往遊初循

田塍僅能容足既而復登山兩山之間泉流不絕良田  
疊出幾萬畝未嘗旱澇皆觀中常住也山行十餘里極  
麻姑之巔自山缺過丹霞界入祥符觀乾德二年南唐  
臨川牧齊王李景達與開山道士黃道英相善為造此觀  
初名真皇章聖朝改今名三清以下七像皆鐵鑄并其  
棟宇扁榜多國初舊牧老道士鄧師善出畫像意其即  
齊王者後人妄加赭袍耳齊王與道英三帖每帖冠以  
周旋二字如答賀正便云周旅以新正特辱示賀之類

紙尾題銜云節度兵馬元帥守太師尚書令臨川牧齊  
王押書送縣某人用天策上將軍印亦其官也日斜急  
歸景常送顏碑一本下山由大路自尉司出行十五里  
夜宿遠池鋪

丙辰晚至南豐縣知縣不在丞張承事耀卿及同官相  
訪極暑疲憊幾不能出語亦坐昨日遊山之勞也自出  
南城門望諸山迤邐而軍山傑出數百丈其左四小峰  
尤秀拔人物炳靈有自來矣

丁巳早黃元授鉞通判相訪世永之父也出西門謁之不遇遂過石仙觀去縣十餘里勅額曰冲寂漢張道陵天師十八代孫開山因巖為屋冷氣逼人真宗朝有冷道者蟬蛻大樹中王博文嘗祭以文久之樹合人遂以為偽元祐中邑令闕視之形狀宛然張天覺賦詩實其事會子宣子開皆有詩又聞道士藏王介甫墨蹟并觀側有棲真巖張仙師葬馬病倦不暇詢訪而歸道過福勝院俗呼籬籃寺是行望軍山尤近相傳吳芮嘗駐軍

於此故曰軍山按圖牒在縣西北四十里高二十三里  
二步第二峰有龍穴旱澇祈求皆驗寰宇記云山下有  
神能興雲雨山頂有王郭二仙聖跡黃元授自言歲九  
月率一至山背登三仙壇山峻不通車馬徃徃攀援而  
上三仙謂王與郭以及其師浮丘伯云山下有護國清  
涼等寺王介甫及三曾皆嘗留詩曾子固與其父不疑  
名易祖正臣名致堯皆葬縣之世賢鄉昌後耆地名龍池  
洞子開葬世賢鄉塘源耆地名獅子崗惟子宣葬京口

張丞携其祖石丞徵明達文集來集中論畫甚精詳蓋李

伯時自出也

戊午早發南豐過溪橋頗壯麗寧都遣人來迎未後至  
松石鋪畏暑而止

己未昧爽有星大如月燭地有光流向東南没巳時至  
廣昌縣令亦不在主簿張從政瑤及同官相訪縣置未  
久褊陋殊甚

六月朔庚申早發廣昌以驛路無人煙出西門入小路

多行崖腹及野約二十里至卽君潭始遇村店四十里  
達驛路遂入寧都界午後抵吳池舖馱之甥及邑丞林  
梓巡尉等慶雲文爾長老皆來迎病暑氣羸卧與爾老  
道舊日夜宿舖中

辛酉巳時至寧都縣與大弟姊別十年矣追懷子柔相  
向而慟晚長道置酒初歸途當出臨川清江急欲至姊  
家故由貴谿至金谿一百二十里至南城八十里至南  
豐一百二十里南豐至廣昌一百二十里廣昌至寧都

一百二十里

甲子東尉王覺民迪功投書

丁卯早約孫宣季札慶雲爾老東山慶傳及獻之甥出  
郭二十里游桃林長老宗暉葺治寺宇頗脩堂下有泉  
歲八月常竭春末漸歸故號結夏泉孫宣季年八十三  
所居名延春谷可以為對宣季諸父志康志舉皆名士  
見東坡集中今皆無後矣去寺數里有七佛父巖南唐  
嘗捨金銀字經寺宇今廢飯罷游金精山陽靈觀山如



削成蔽虧險性其色赤黑乏秀潤相傳漢初吳芮過山  
下聞張氏女有殊色欲聘之女誘芮鑿山為洞乃可相  
從洞成女飛空降語曰吾金星之精降治此山豈若偶  
耶芮惶懼而退今被髮石鼓諸峰皆傳會知說也自觀  
中穿石穴過三清殿望羣山周圍無缺獨左崖微罅水  
涓涓下滴貯以方斛為流盃池前邑丞姜覺所造也天  
大暑而崖下凜然日落乃歸道傍有東陽巖一黃冠居  
之庭宇頗幽靜望見木鍾杵臼棲巖間唐人煉丹遺跡

也

庚午初伏雨涼洪州劄探都督府五月出師收符離獲  
蕭琦富察特默等吏直翁以是月十五日罷相

壬申過惠政橋遊東山

癸酉晚別長道大姊登舟行數里止

甲戌早至唐步虛令七四及寧都寨巡檢邢寶歸縣午  
後至河東虛爾傳二長老相別申時過石城江口舟人  
上廟夜宿白頭翁

乙亥早入閘水既澁而舟人不熟河道衝撞傾側欲碎者數矣午間惡熱未後暴風異常正觸亂石危不可言急令諸僕入水持舟久之風定方能去夜宿白田

丙子風雨已時至雩都縣不泊過大灘亦險而招灘者熟知河道揆施有方賴以安然夜畧繫纜乘月復行

丁丑早過七里鎮抵贛州泊唐步門權州任提刑

文薦希純

來假大舟以居入壽量寺訪舊居惟盧光稠鑄鐵佛及羅漢在耳自癸酉歲到此今復十一年矣是日江水暴

漲昨夜浮橋斷裂任希純云傳聞南安軍發洪浮沫蔽  
廐

戊寅早約李及之飯不至與陳老高行二甥及李儀之  
綦共食食罷過水東奠李氏妹墳問途於華嚴堂披荆  
棘至墓下歸同汪強中提幹憺游鬱孤臺面對崆峒俯  
視章貢城壁僅如繞帶蓋登臨之勝地也強中言頃侍  
其父彥章南遷以事至廣西靈川界灘水上見秦時壘  
大石以殺水勢謂之鉞背水觸石分流故其字從難有

碑紀其事又云鑄甬有二其一在古北口小酌臺上循城過庾江流訪入境臺不復見矣後得柱管觀察使孟威重修零渠記云零渠乃陽海山水一派也謂之灘水舊說秦命史祿吞越嶠而首鑿之漢伏波征徵側而繼疏之所以導三江貫五嶺其後隄防盡壞唐寶曆初觀察使李渤重為疏引尋又堙圯咸通中為用五萬三千餘工費五百三十餘萬起九年九月而以十年十月畢上詔書嘉獎云省所奏新添嶺首運糧路鑄甬堰零渠

斗門事具悉云云

已卯極暑早謁客慈雲寺遇長老妙應同過報恩酌廉泉入景德寺而歸李均秀才攜長書相訪養素處士珙之子予幼從養素學齊述之亂父子死於兵族人共以均為其後李儀之馬君壽永之胡從周鎬皆致來禽其致羊酒者皆却之已時赴州會退而解舟蒞贛縣詔寬之及丞簿尉送別數里外丞即從周簿姓曾名三復皆吉州人至儲潭上廟廟有唐刺史裴諤詩石晚泊橫弦

上

庚辰午後至萬安縣知縣左承議郎程九萬相訪申後  
得水手即行江漲十八灘皆平

辛巳早至太和縣知縣右奉議郎張之德簿右迪功郎  
晏滋訪快閣有過客不可登頗以為恨已時得水手即  
行七兄自永和來一別復五年未後遇大風雨趨岸以  
避之晚泊白沙

壬午早移舟東岸登鳳山拜墳遂過方廣與呂氏姊及

兄弟會哭子柔攢堂飯罷歸永和本覺寓居



文忠集卷一百六十五



欽定四庫全書

集部

文忠集卷一百六十六  
七

詳校官庶吉士<sub>臣</sub>李傅熊

主事<sub>臣</sub>呂雲棟覆勘

總校官進士<sub>臣</sub>楊懋珩

校對官學正<sub>臣</sub>李巖

謄錄監生<sub>臣</sub>蔣繼勳

欽定四庫全書

文忠集卷一百六十六 閒居錄

宋 周必大 撰

起隆興癸未七月庚申止乾道丙戌九月己酉

隆興元年歲在癸未七月朔庚申

甲午早泛舟入城赴州會會散過隆興寺通判黃朝散  
槩相訪給事中廉之孫尚書叔敖之子魯直猶子也雙  
井茶乃其祖槩所產歲纔收數斤嘗其味絕不類草茶

向來所得皆贗耳雙井在大溪中即修水也上井可深  
四丈下井六丈沙石過而不入晚長老了達具蔬食初  
閒禪師造此寺往乞某家林木其人不可妄云待樹上  
生葫蘆當奉施未幾閒扣門曰葫蘆生矣視之果然削  
樹而跡愈明遂捨之今法堂皆徧而葫蘆形如刻云

九月朔己丑遊清都觀觀興於南唐保大中舊號西臺  
治平改今名是歲創清都臺下臨荷池遠眺諸山蘇翰  
林為顯其榜仍留詩見集中舊有逍遙堂大臨元明賦

絕句云心遊魏闕魚千里夢覺邯鄲黍一炊蔬食菜羹  
吾亦飽逍遙堂下葉辭枝或謂魯直所作

庚寅早謁輔順廟威遠侯俗呼王仙廟廟有南唐匡甫  
所撰碑銘後題顯德五年十一月八日蓋是年五月李  
璟始用正朔故稱顯德其叙立廟大畧云太和縣江東  
有王嶺相傳王子喬憇鶴於此唐正觀間匡和先生六  
十棄家入山學道興臺院云云至天寶中封山為王謂  
子喬也而即封和為匡山王且立廟焉後因勅使詣廟

祈禱至瓷窰小吾園若有影響遂創此以為別廟瓷窰  
園即今之鎮也又云匡氏之祖以晉永嘉二年渡江來  
其文詞甚凡下不足考信然字轉匡為王者豈以避太  
祖諱故耶大抵廬陵言王仙事跡甚多如永嘉興福  
之觀值夏之市大臯之渡皆是也興福觀在郡城南三  
里俗直以王仙名之崇寧中郡人葛敏修聖功作觀記  
云故老傳仙諱子繇字大臯東漢喬之弟晉永嘉中得  
道所過皆以其姓目之山曰王山村曰王田廬陵為觀

亦曰王仙太和縣圖經乃云王喬嘗控鶴於此山其後  
墮馬血食山中按東漢葉令王喬至晉永嘉蓋三百年  
不應與子繇為兄弟疑子繇當晉之亂隱居得道山中  
世俗因以喬事附著之耳觀聖功所記與此碑殊不合  
未知孰是按梁湘東王古今同姓錄凡六王喬一周太  
子字開山一晉廬陵太守一漢令葉一古仙人一河東  
人一魏人杜光庭王氏神仙傳亦載王喬有三一子晉  
一葉令蜀中食肉芝者則聖功所謂訛繇為喬尚可疑

也夫事至於千百年固多差訛況雜以神仙渺茫之說乎大臯渡去永和七八里安福永新之水至此入於江其名畧見南史陳紀而上人妄呼大篙以為王仙嘗擲篙渡此水尤為荒唐值夏在永和之上二十里小江中云王仙至此值盛夏因以得名永興觀去永和五六里十月朔戊午

丙寅遊青原山靖居寺七祖大師行思道場也自鎮渡江行六七里岡巒環擁過山門方見屋瓦其寺頗迫窄

塔在山之顏躡階上下塔左有三泉號錫杖虎跑雷泉  
唐顏魯公題名及元豐六年黃魯直二詩並刻泉側魯  
直碑先祖貳郡時嘗跋其後飯罷南過釣臺面對太山  
下臨清溪氣象幽深可以隱居溪淺而源深其支流循  
寺而出按唐大中五年四月前刺史段成式寺記云景  
龍三年為蘭若天寶十載為寺所載亭臺頗多今皆不  
可考甚重顏碑亦叙三泉所可見者此耳成式文務竒  
澁或不能句午後由小徑過龍集院歸訪彭子從墳庵



逼暮到家

己巳早同子澄季懷遊洞巖去鎮七八里過白沙渡又五六里至朱陵觀知觀朱守常及識王父云按南唐徐鍇開寶四年所作觀記載舊止名洞巖隸吉水縣傳者云昔天師嘗再定天下名山三百六十五以應天度此居其三百二十六又云峰有雲嵐玄秀之名洞有青帝西靈之精又有對歇峰徊嵐亭又云故老傳先天中謝行仙於此學道貞元中刺史閻宋請立觀其大畧具此

飯罷登自雨巖即東洞也

徐鍇所謂青帝洞者

四顧川原衍沃心

目開明泉自巖而下點滴如簷溜水積而不溢道士云  
下為伏流出廟前理或然也東南望赤嶺橫亘十餘里  
而不甚高或云其上多高塚故名大墓嶺或曰敗墓嶺  
蓋舊傳此地有王氣南唐時白氏居其傍特以狂僭事  
覺因捕發其祖塋以厭之故此外大山鬱然諸峰皆聳  
秀其坳一峰劍立者杳成山也頃之過西洞

鍇所謂西靈之精者

李懷祖墳在路傍山上往觀馬下山日已過午杖履行

谷中荆棘翳路命從者掃除以進小溪曲折凡十七渡  
乃望見山尾相銜一山居中如屏障水自兩山出是為  
雙澗之源而山後之泉流為青原水矣此去水源極近  
而樵蘇路絕不可往回至觀中少休命道士取琴彈清  
溪搯曲終上馬如值夏距洞巖七八里中路過白竹院  
前遂渡入市民居數百家聞承平時甚盛今稍衰矣游  
胡氏舊宅上月臺登南樓望香成山纔十五里不若遠  
望之蒼翠也步至太霄觀治平間重修已復破弊自此

登舟水甚淺盪而後行過鹿渡口

或云  
虛渡

十里出白沙江

口乘月放溜而歸

庚午陰早同子澄季懷飯訖泛舟送子澄於神岡岡去  
州十里突然而起高數十丈其形如龜俯首伸頸而隆  
背神祠在項背間號惠佑廟封嘉應侯按重刊咸通中  
廟碑及熙寧乙卯修廟記並云神姓劉名竺字世泊陳  
鳴鳳中為廬陵太守卒官而廟食焉其傍有西臺精舍  
可以登覽子澄既別去予與季懷登山椒訪舊廟基盡

見近城諸山其後巍然而大者龍西也江流橫陳小江  
右出勢如磬折帆檣來往煙樹掩靄農事既畢牛羊散  
布於平原曠野之間若即其地築臺以盡臨觀之美當  
為此邦之絕景

十一月朔戊子

乙未遊西峰寺寺在柵門外南安巖主得法於此門外  
松徑蕭森寺後有三秀亭在松林間舊名秀野以芝生  
改今名黃魯直作記

十二月朔丁巳

戊寅董參政德元字體仁吉之永豐人靖康元年鄉  
舉第一後以恩科入官待道州營簿闕石塘劉氏延教  
諸子紹熙十七年與之應轉司試非其志也既而復高  
中宗族強之赴省比殿試遂為第一以有官降第二特  
補左承事郎簽書鎮南軍節度判官廳公事召為校書  
郎二十四年三月除監察御史六月遷殿中丞崇政殿  
說書與右正言王岷并特升侍講明年三月進侍御史

六月擢吏部侍郎超拜左中大夫參知政事十月秦檜  
薨而德元以十二月罷為資政殿學士臺官湯鵬舉論  
列不已遂以本官提舉江州太平興國宮家居八年卒  
年六十八德元循謹自守不事矯飾此其所長也為臺  
察時病傷寒甚困夜夢碧衣童語之曰無憂君上世有  
陰功雖數百年其籍故在且為天官矣次夕又夢至一  
亭望耕農滿野前童子亦在語德元曰此皆君所食祿  
也覺而病良愈歲中典史銓自以為應天官之夢未幾

至參大政值乙亥南郊即位方虞德元實為大禮使行  
太宰事者兩月既歸第宅田園日盛悉與夢合

隆興二年歲在甲申二月朔丙辰

辛酉同七弟鷄鳴登舟至乾明寺前出陸行二十五里

飯秀

奴梗反

岡鋪又二十里過東界渡入小路數里至善

生寺寺本渡頭廢刹今主僧宗式買地於此而興之蓋  
四十二年矣內外嚴好竹樹掩映為留移時宗式姓朱  
氏東界大族戊申己酉間予家避患於其室頗遭剽掠



宗式猶記祖母先夫人其他良賤皆能言之寺有破籐床云予家物也自此多行田間乃借僧驟以代輿過上邳市居民稍多北行望一山團巒與衆峰不同土人謂之聖嶺嘗有頭陀居之今禱雨輒應自善生約十里至吉祥山寶巖院按記南唐保大十五年將仕郎知彭澤縣鎮薛良撰創於蕭梁至唐天寶中僧利涉居之日誦觀世音號懇求聰明果得辨才無碍有言論載傳燈錄嘗鑿泉於山脇號聰明泓澄澹足至今不竭院初名吉祥德宗加咸通二字五

季分蕩屋宇遷徙偽吳順義中有歐陽彬者募衆力新之今人經改造矣彬在南唐為武昌宰即大忠公曾祖

也彬墓東去院十五里地名桐木宮山晚宿上方其下砌石五級列植山

茶方盛開捧盃如輕雲登閣四望翠峰環密獨缺其西南云極類南嶽之峰雙院去城六十里

壬戌早七兄題壁而行約十五里至龍須山法雲禪院昔曹溪六祖大弟子曰法登吉之安福人青原思大師兄弟也徧得六祖之道唐大曆中來隱此山有地人龍

鬚盡以山林田宅施之故號龍鬚山代宗賜額為長興寺德宗時登卒創塔於院西三百餘步高二丈四尺武宗毀浮屠至其石函遇風電雷電有羣虎來衛不果毀太和三年改為長興禪院明年又改宣化本朝開寶三年易號妙峰取登所用錫杖衲衣入內未幾復歸之賜謚博濟禪師塔名法雨大中祥符二年改今名衲錫皆在取而觀之院記云唐大中十二年賊竊衲衣取其市中幘棄衣草中野火焚山獨衣傍丈餘草木如故微光

發徹遂求得之又古碑云長慶年登禪師開山中廢天

祐中道殷禪師

姜姓

重葺治之天聖以前猶曰妙峰與僧

德宗所記異同寺有偽吳順義七年所給戶帖用尚書

工部之印其末署右司郎中判押故人將仕郎李孝基

嗣卿自勞村來遂同長老師古步至法雨塔及巢雲庵

飯訖嗣先去與師古坐覽翠閣甚久寺宇幽邃老宿所

驟門外絕無居民舊藏辟支佛頂骨近為人竊去申後

出山約十餘里至勞村訪嗣卿其傍有小寺亦往遊焉

辛巳陰早挈家遊青原招長老以宣飯去寺百步有山約立如覆鐘號石軍山王贄侍郎及其子億職方葬其

上半山有二碑

贄碑張方平撰  
億碑王安國撰

四月朔乙卯

甲申雨陳立夫云四月十月雨甲申其兆為旱農父之占如此亦難據也

五月朔乙酉

戊申夏至土人是日五更占風北風為豐年人皆開倉

南風則閉糴大槩類甲申占也

九月朔癸未

丙申監鎮秉義郎陳士章殂士章雜流出身或云東坡遺腹子也其狀亦彷彿而兩子皆登科

戊申早七兄往靈泉寺訪尚五夫人墳予與二兄季懷泛舟繼往泊林梅渡龍王祠前登岸二三里至其寺劉子澄先生在遂共飯寺倚螺子山按圖經山在廬陵縣東北十里周回十八里高五十丈昔有漁人至此得五

色螺因為名而寺僧又訛而為騾以為仙人自此乘  
白騾飛昇總其實皆非也山無林木其形盤互如螺蚌  
形耳州城以是為主山故名特著下有螺湖其流淺  
狹入於江故州之別名曰螺川焉山頂舊有小亭遺跡  
猶在往年太守勸農於此衆客頗憚登涉惟七兄褰裳  
而之頂上歸云四望平遠有足觀者問寺僧靈泉在門  
外數十步得小井無他異也由別徑步過珠林入護國  
院門術幽深面對黃原白玉諸山本與靈泉皆為邦人

遊賞之地今轉而為北邙矣子澄自此入螺岡門先歸  
子與二兄李懷復行二三里入北庵招義寺按慶厯間  
朱處約記文云祥符中僧守至首創精舍後三十餘年  
而成景物幽寂近城不易得也門有水松三株可觀自  
此度雲騰嶺觀沸塘塘可半畝感沸如魚沫傍有小亭  
上直雲騰廟蓋玉笥山九峰之支嶺也初有吳史君隱  
居得道天寶中見夢明皇云吾今為金天神有詔即宅  
立廟土人呼為南祠水旱祈禱甚驗此其別祠也故其



嶺亦號雲騰云謁廟畢日已晚繞城問歸路至南柵門  
暮色蒼然復登舟小酌是日舟車所歷殆徧四郊到家  
將二鼓矣

十月朔癸丑土人是日以青箬裹糝飼牛而取其餘塗  
牛角使鵝鵝食之欲其為牛撮蛋蟲云

甲子食罷同七兄至方廣遂約文山人過鳳山以籃輿  
登其巔去平地約五里眺望甚遠州城塔寺歷歷可數  
江流曲折遠者接天近者如半沼山之陰即青原也惟

其左為羣山擁蔽無所觀覽是日天氣陰寒既登山而晴和移時乃去聞百步間有界岡廟亦一訪之神像皆唐裝其來遠矣

戊寅同子中遊廬江岡去鎮約四五里相傳陳霸先嘗駐師尚存壁壘故往訪焉以竹輿周其頂茅岡中有疆礫而已

十一月朔壬午

癸巳早入城遊太玄觀有泉頗佳故俗呼三泉

乾道二年歲在丙戌五月朔癸卯

壬子聞南山地陷圍數十丈深倍之下濁水四傍之田  
皆傾裂水泉湧出他山亦然其地在水和南五里父老  
云山側往有尼寺號本覺百餘年陷而為塘泥中猶存  
柱石距今所陷纔百丈許殆潛蛟所為也或謂鎮之本  
覺亦號南山即尼寺舊額按太平興國四年記文此寺  
自號報恩禪院未知孰是

七月朔壬寅

戊午五鼓約胡李懷蓐食訖乘月過聳福院去鎮十二  
三里下車方辨色乘涼易山轎又行二里許登娑羅嶺  
嶺高而路峻廟在崦殊草草土人率以月日祭賽遇大  
旱州官或來迎請而不載祀典前後引四松遠望而見  
者此樹也日色已高而雲氣崩騰不容極目頗以為恨  
歸飯寺中

庚申早過方廣回入落塘源觀歐陽氏陰地遂上雞岡  
永和之朝山也窰泥皆仰給於此遇地脉可鑿躡階以

入深至數十丈初取皆細泥見風乃凝如白石一穴盡  
即他之山為之蓋不知幾百年或云隨取隨生恐是理  
徧觀山頂其高稍亞金鳳而相聯屬

九月朔辛丑

己酉骨肉過神岡登高飯於西臺日午復登舟上東岸  
行二里許入洞元觀小酌竹軒道士出大中祥符間州  
牒本以永興為名疑南唐或國初所創治平中改洞元  
今大臯渡之南復有永興當考酒散至江邊得小寺曰

寶仙明爽額類浙寺

文忠集卷一百六十六